

«In sentiment nundescribibel»

La Televisiun Rumantscha preschenta il film «Dunnas a chatscha» da Menga Huonder-Jenny

DA HANS HUONDER / ANR

■ **En vista a la stagiun da chatscha che stat avant porta preschenta la Televisiun Rumantscha sia pli nova producziun cun il titel «Dunnas a chatscha». Il film che resplenda ils sentiments da quatter chatschaduras da differentas regiuns dal chantun Grischun è vegnì realisà l'onn passà da Menga Huonder-Jenny.** La chatscha grischuna è ina domena dals umens. Da radund 7000 persunas che possedan la legitimaziun dad ir a la chatscha en il chantun Grischun èn sulettamain radund tschient da la schlattaina femini-

na. A chatsch'auta van struschamain 80 dunnas. Tar il chantun constatesschan ins dentant onn per onn in augment da chatschaduras, perencunter ina digren dal dumber da chatschadurs. La cum-part da las dunnas crescha pia cuntinua-damain. L'onn 1902 ha l'emprima dunna, Netta Beer-Camen, pri la patentà grischuna. Cun 72 onns è *Liseli Frey* oz la pli veglia chatschadura. Dend in sguard enavos en la istorgia dals auters tschientaners pon ins constatar che las dunnas giugavan tuttina ina impurtanta rolla en la chatscha, betg mo en il chantun Grischun. Uschè era la chatscha ina occupaziun desiderada per exempel da

mungias u er dunnas da chasa che stuevan procurar per la vivonda.

La chatscha è ina passiun

Ils davos onns ha la Televisiun Rumantscha adina puspè inizià il temp da chatscha e las selvaschinas. «Quai è in meret da mes antecessur *Peter Eglof* ch'è sez chatschadur. Nus lain dentant cuntinuar cun quellas tematicas che interesse-schan e fascineschan bleras Grischunas e blers Grischuns», di il nov manader da la Televisiun Rumantscha, *Mariano Tschuor*. Cun il film da Menga Huonder-Jenny, la consorta dal scribent *Silvio Huonder* che abitescha a Berlin, na vegn la chatscha er uonn betg a la curta. La producziun da 24 minutas è vegnida fatga l'onn passà el decurs da l'avust e dal settember. «Nus avain vuli esser aschi datiers dal sentiment e da la passiun sco mo pussaivel», di Menga Huonder-Jenny ch'è creschida si a Cuira e che studegia e lavura dapi passa diesch onns sin il sector dal film a Berlin. La tscherna da quatter chatschaduras da differentas regiuns dal chantun Grischun ed er da differenta vegliadetgna fa quella producziun fitg interessanta ed infurmativa. «La chatscha sco tala stat en il center e mintga aspectatur sa far sez in maletg da quai entusiassem», di la reschissura ch'è vegnida sustegnida dal producent *Urs Frey*.

Cura che las chommas tremblan

Ch'ina dunna u in um exequeschia la chatscha: La tensiun enten chattar la selvaschina, perseguitar quella e dar ad ella

il siet mortal n'è betg mo gronda, mabain er singulara. «Quel sentiment è nundescribibel», di l'inschignera forestala *Anna Mathis* da Scuol. E *Susanne Maissen* da Ladir che sa scolescha sco ortulana da cuntrada a Berna, relata: «Sunter avair sajettà per l'emprima giada sin ina selvaschina, han las chommas tremblà endretg.» *Ursina Thomann* da Segl en Tumleasta ch'è stada l'emprima presidenta dad ina secziun da chatschadurs en il chantun Grischun (secziun Annarosa) conceda: «Sco dunna dovra i blera curascha dad ir a la chatscha.» La Lumneziana *Pirmina Nay-Caminada* da Vella vegn portretada en il film durant in di da chatscha cun tschajera. Per ella n'è la chatscha betg terminada quel mument che la selvaschina è a val. Ella mussa ses inschign da far mezca e manegia: «Jau hai in sentiment profund da savair mussar mia preda als mes, fitg sco quai ch'il giat vul mussar la mieur avant che magliar ella.»

In bellezza sentiment

Che la chatscha è ina passiun en il vair senn dal pled, vegn accentuà en quel film cun las differentas sequenzas che tematiseschian il temp avant e durant ils 9 ed ils 30 da settember. Las preparativas – surtut quellas che pertutgan l'exercizi da sajettar – mussan che la chatscha na pretenda betg mo in bun equipment, mabain er in maun ruassaivel. Las registraziuns da la damaun e dal territori resplendan la fascinaziun da las muntognas e natiralmain da las selvaschinas. La reschissura na tralai er betg da mussar co la muntanella croda suenter in

siet prezis. Al pled lai ella dentant er vegnir ils umens. Lur opiniun areguard las abilitads da las dunnas pertutgant la chatscha è pli u main unanima: Las dunnas èn almain uschè qualifitgadas per la chatscha sco ils umens.

La premiera dal film ha lieu venderdi, ils 29 d'avust 2003 allas 20.00 en la sala Chalavaina a Cuira. A la televisiun vegn il film emess suandotamain: Dumengia, 7-9-03 allas 17.00 SF1; sonda, 13-9-03 allas 11.40 SF1; dumengia, 14-9-03 07.40 TSI 1.



Susanne Maissen va dapi l'onn 2000 a la chatscha.

FOTOS MAD



Pirmina Nay-Caminada ha già success a la chatscha. Si dies porta ella in bun buccamutsch.